

歐虞部文集卷之十一

嶺南歐大任楨伯著

行狀

先祖處士遺安府君行狀

府君諱思本字道立先世自金陵遷韶州瀘昌縣
宋建炎間江州提舉公諱端自韶遷廣江州之子
殿撰公諱志平始定居南海陳村自後子孫蕃衍
郡邑稱名族者每曰陳村歐氏云府君高祖太學
上舍諱仕衡曾祖武僊縣丞諱子服祖諱國瑤考

諱真禮妣何氏兄弟四人府君幼失怙恃長兄道存蚤喪惟次兄道得是依繼母余氏提攜保育稍長卽能刻志誦讀通毛詩尚書從吳萊先生游能爲古歌詩文辭時方賤儒列籍于倡丐之間而以達魯花赤臨治郡邑府君歎曰是尚可以仕哉遂絕意不應辟舉居家事繼母如己從出飲食必親饋之不以委于婢妾事兄盡恭順之禮怡怡如也恒以不及致養父母爲恨每遇忌日痛哭如初喪與兄創建祠堂三楹顏曰垂裕堂以祀高曾祖考

捐田百餘畝爲蒸嘗以冬至祭始祖以立春祭先祖塲與無後者祔焉祠祭之禮于是爲郡邑倡矣至正之末干戈日起郡邑豪傑爭爲雄長府君獨築室退隱躬耕自給古岡張彥謙稱之曰龐德公之流也府君因號遺安自著遺安先生傳曰先生南海之畸人也幼孤先人遺以草屋數間水田三百餘畝有丁男三四人畜牛二頭歲勤耕稼自食其力倉庚載鳴盡室在野耒耜不寧秫稻並種秋穫旣終週年飯足時復畜鷄釀酒以供賓祭宅邊

有松有菊蕭如也時復斗酒自勞鼓琴而歌曰貪夫而可爲死不能懷玉與珠勇士而可爲死不能執戈與矢嗟嗟時兮吾旣不能爲勇士又復不能爲貪夫所以遺吾子孫者安乎安乎遂逍遙玩世以終其身後雄長之徒盡編戎伍府君獨免人服其智 明興以來增置產業教子力田家日以裕每于橙黃荔丹之時往往治具邀親戚故人高吟暢飲竟日夕乃罷田園之樂一寄諸吟咏其詩有落日鳴蟬無客到西風低草見牛歸之句評者美

其高逸云性旣恬淡不習侈靡待人接物必主于敬宗親之無後者辨大宗小宗之異爲之立繼曰某當繼某某當繼某著爲宗法以傳人咸式之郡守吳彥銘敦請爲鄉飲賓府君終辭不赴宣德四年己酉五月初一日以疾終距其生元至正三年癸未四月十四日享年八十有七先娶碧江蘇公玄庇之女有賢行先卒繼娶李氏宋忠簡公裔孫國瑜之女克嗣徽音生于至正三年癸未九月十八日終于宣德三年五月二十日享年八十有六

子男二人長祖榮蘇出次祖華祖芳李出祖芳出
繼履端女六人適吳子仁陳尚義屈銓曾節鄧瑀
琮趙某皆李出曾節則廣東解元也孫男三人宗
巨宗平宗池曾孫若干人宣德九年甲寅十二月
十四日祖華等奉府君與李氏安人柩合葬番禺
白岡嶺巽向之原御史王公子倫爲之銘墓埋諸
幽矣大任府君之五世孫也竊伏思念子孫得免
繫于尺籍者府君之賜大矣遺安之澤其有窮耶
矧孝友勤儉貞靜智勇躬行有大過人者皆可爲
子孫百世法也恐遂泯物無以表示來裔謹據家
傳墓誌爲狀伏乞鴻筆著爲碑表鑿諸樂石幸焉

高祖處士南野府君行狀

府君諱祖華字英玉別號南野南海陳村人也高
祖諱子服曾祖諱國瑤祖諱真禮考諱道立妣李
氏府君生于洪武四年辛亥四月初八日卒于正
統六年辛酉十二月二十四日享年七十有一安
人梁氏生于洪武二年己酉二月二十九日卒于
景泰元年庚午九月初一日享年八十有二府君

幼有至性孝順慈和洪武之初民初脫湯火得安
衽席土地荒蕪居室寥落府君力田養親承志不
違于是闢荒理穢築室廬保蓋藏諸遷徙者咸相
依以居鳴鷄吠狗烟火數里龍津錦水之間遂爲
樂土府君爲鄉約率先閭里早輸租賦里社之會
規勉六行復爲詩以詠歌誘掖之有司欲以孝弟
力田舉府君府君依依不忍離親側以書辭免平
居足跡不至城府唯與南海孔伯平古岡鄧林游
時乘扁舟相訪酌醴焚魚賦詩言志泊如也府君

尤謹祀先之禮講求不勌時從弟玄祚以己地卽
九峰書院故址爲大宗祠府君率族營建親督工
役上舍公之功德始專祀有所矣晚喜讀釋部以
爲積仁順蠲嗜欲習虛靜而成通照皆緣淺以至
深籍微而爲著修心之功則依佛法之三歸五誠
而不離乎人倫日用之常出見饑寒者卽解衣與
之或遺之飯粟未嘗或吝鄉民陳志馬三劉尚遷
姚觀仔丁氏郭氏皆死無親屬者爲之棺斂以埋
之六十之外卽傳家政日與從弟玄生僧靈觀倡

和于南野草亭偈頌詩賦彙成一卷復加意藏畜
先世遺墨積成巨帙府君卒後經黃寇之亂俱散
軼不存矣正統甲子十二月十三日葬府君于番
禺白岡嶺巽向之原安人梁氏則于天順庚辰十
二月二十四日合葬焉側室翁氏別葬側室梁氏
祔公墓次子男三人長宗巨翁出次宗平梁出次
宗池則安人梁氏出也女六人適某某孫男十
人孫女幾人曾孫男二十六人玄孫若干人府君
歿時遺命不得爲碑銘墓石尚缺某竊懼祖有善
行而不傳不仁甚矣輒不敢自隱以所聞於先人
者著爲行狀求立言君子表于墓道百世感矣

將仕佐郎雪竹府君行狀

府君姓歐氏諱瑤字積恒廣州順德人高祖諱真
禮曾祖諱思本祖諱祖華考諱宗池以高年授冠
帶爲壽官妣馮氏府君生于正統己未十月二十
七日少聰警凝重不類凡兒七歲時壽官公攜見
唐豫先生坐于竹下先生指竹曰封君千畝命府
君作對府君應聲曰天子萬年先生驚歎不已曰

異兒也忠孝之志見于此矣遂勵志讀書篤行好古比長則代勞服事故不得以舉業成名事父母承意順志壽官公伯兄二人雖異居而飲食宴語旦夕未嘗不同府君事之如一得其懽心居父母喪餐鬻百日卒哭乃已終喪乃徧尋名山卜葬番禺馬嶺之下府君素精堪輿之學曰此牛眠吉地也可以安吾親之體魄矣蘇方伯葵黎同知暹爲之表銘于墓而鄧副使炳又以馮氏安人賢行載之邑志蓋皆成府君之志云旣而率諸弟姪買村心地一所以爲考妣祠堂未及營建而終嘗督修先祖祠墓用心盡力衆服其勤且公精神氣力老而不衰父祖墓祭雖遠必躬修常事未嘗憚勞府君尤友愛諸弟怡怡如也撫遺腹孤姪惟璧有恩經營居室增拓產業一一皆輔成之每訓子孫必舉前人興衰以爲鑒戒嘗曰宜慎于躬宜儉于費斯爲成家之本處鄉族朋友貧則相恤患難則相扶持成化初元奉詔輸粟助邊授將仕佐郎晚傳家政優游自得創雪竹亭以明其志因以自號焉

與雲崖鄺自牧筠巢鄺宏游日以吟詠爲樂工部
侍郎李公嗣通政司叅議張公詡都御史何公經
御史鄺公文嘉其行義咸爲詩文以贈其所自作
有像贊律詩數十篇藏于家以嘉靖壬午五月十
二日卒于正寢享年八十有四配安人黃氏同鄉
黃公鵬之女也相府君孝事舅姑和睦娣姒克勤
克儉內助居多生于正統丙辰十二月二十一日
卒于正德甲戌七月十八日享年七十有九子男
五人長與季蚤卒次曰維綱曰維常曰維紀女一
人適庠生鄺惟良孫男九人曰廷選吳忠吳志師
孔廷詔吳恩吳憲師顏廷諫女五人適某某某某
某惟綱等于府君卒之年九月十七日奉柩合葬
于番禺寧仁里大崙山甲向之原任乃府君之從
姪孫也幼年猶及見府君長身玉立言動以禮每
元旦必服冠帶望闕拜舞祠祀賓燕則深衣幅
巾望之知其有德君子也一日于祠下訓諸子姓
曰不好人三字吾尚不忍言之于口况願汝輩身
爲之哉子姓莫不肅然竦聽任與聞焉今不可及

也已府君之行誠足以教于家者任輒不自諱謹
列于狀以俟銘墓者采焉

敕封太孺人卜氏行狀

孺人姓卜氏廣州衛指揮同知襄之女嫁廣東都
帥梁公次攄爲側室都帥故太師文康公長子也
生子一人曰孜孺人溫厚凝靜服事甚勤旣出名
家事都帥稱有禮法當是時都帥以宰相子積武
勳僉書戎政故豪俠人也孺人佐以恭謹蚤起畜
雞飼豕釀酒造醯澣衣滌器染絲劈絮僕僕逮燭

不自休以是能殖其家稍給都帥歲時繕服之費
然雖以織治生至于振親族之乏恤閭里之貧繕
橋修路粥餓樵齒亦無所嗇都帥慷慨然諾傾貲
結賓客蓋藉其力爲多太師解政歸日與故人遺
老剖羊擊鮮載酒游山爲樂孺人傳鞫治具一不
委于庖人卽有祭祀之事烹飪尤嚴潔一羹一馐
未祭不得先嘗雖事事勤篤亦不敢專必以請于
諸姑諸妯以故諸姑諸妯款款益和處子姓內外
婢僕皆有恩無一不得其懽心者都帥卒時孜始

六歲孺人于寶玩錦繡一無所取惟撫養孜然厯
厓不爲姑息居常勿與梁肉所與襦袴不過鮮華
曰孤兒豈勝錦衣肉食耶里巷謳歌裘馬之地皆
戒勿近卽鄰舍小兒儻蕩無狀者閉勿與游歲延
老成賢師教之孜習舉業將成食貧苦心得怔忡
疾孺人慮其勞以瘁也遇夜讀爲之滅燭掩書曰
兒能澡身修行以不辱先太師幸矣于是孜習爲
醇謹以儒有聞四方雅游每過孜孺人輒趨治殺
醴無所顧惜孜創造先太師祠墓工垂成而囊篋
已罄孺人脫簪弭助工完之適室鄭夫人莊謹人
也孺人尤嚴主君之敬旦夕上堂手進觴匱至老
不違人以是益賢其禮嘉靖戊午孜蒙 皇上恩
以先太師蔭補爲中書舍人三年考績孜奉 敕
封母爲太孺人歸拜庭下孺人益祗懼感激戒勉
益至每晨起焚香祝天願 皇上萬壽願子孫多
賢且謂孜曰勉思職業毋玷清班爾勿諄諄于求
福無禍卽爲福矣癸亥春孜以使事便道歸省欲
迎養京師第不敢言諸孫方眷戀攀留因親戚爲

請孺人曰我豈老悖不念諸孫哉但不忍使孜事
主有違母之思比孜于甲子春戒行孺人竟慰別
諸孫同孜北上抵儀真促孜曰使事有嚴趨往復
命吾旦夕往就爾祿養矣孜至京師孺人行間忽
痰作及徐州竟彌留不起卒之日卽是歲八月二
十日也距其生于弘治己未二月初一日享年六
十有六嗚呼哀哉孜娶張氏孫男五人長紹績娶
李氏次紹紘紹纘紹縉紹綱孫女六人長適從化
庠生康鳳鳴次適四會庠生林應驄次適南海林
作聲次適刑部觀政進士余嘉詔次適嚴襄龍餘
尚幼曾孫男一人昇曾孫女一人孜扶柩歸葬有
期以大任通家子畧述行實俾敘次爲狀大任久
欽壺懿因備列之以告于太史氏幸有擇焉

明贈國子監助教龍川先生梁公行狀

公諱獻言字諫甫廣之順德人也系出南海龍頭
里學者因稱爲龍川先生祖某父某皆隱遯不仕
公幼穎異俊爽童年讀書里巷日誦數千言長益
肆力課業覽觀經史百家尤以毛氏詩專門爲文

純厚爾雅弱冠里中推爲社學師縣令曾公仲魁知其文有名接以優禮令諸社師子弟悉來受業嘉靖己丑補縣學弟子員數年以來寄寓縣城時時歸省其親實未有一椽之室以寧居也丙申御史陳公大用行部試諸生首擢其文會學諭王公時中白公善狀于御史遂檄縣令築室以居之于是始有敝廬于縣城鳳凰山之東云遭父喪擗踊悲慕力不能厚舉殯葬然動循家禮逮母卒哀毀幾不能生後每遇忌日必齋素號哭曰傷哉貧也

魚菽之祭吾父母能歆饗乎授門人詩至蓼莪輒有王哀之感泣下不能卒業門人莫不沾襟焉家故窘窶妻子恒有餓色獨施予不倦路逢一兒啼餒欲絕捐食與之時天寒甚解所衣緼袍覆之待其稍甦乃遣去有老嫗遭疫垂死行乞于市人畏惡之恐傳染也公食之廡下又率門人買帛給之或以爲費公曰吾不忍其委溝壑以死而又何惜此費以傷吾心哉里人周廷綱者舊友也貧老無子時延至其家令家人供具甚周時又瞻其不足

宗戚時有所缺乏輒推束修所餘稍分給之其急人之窮死且不易以故家無儋石之儲簞瓢自樂視財利得失畧不足介其意者居鄉恂恂篤厚犯而不校族人見公早孤無兄弟迫令從軍公探其意有所索乃勉出貲與之始得一意向學然竟忘其爲讐已也鄉豪有一僮夜竊其主券亡去欲以匿奸見誣大詈于市時縣丞李景明主簿任良弼咸寃其事公之子桂臣爲諸生已聞名于郡邑中矣與門人欲直之公曰此妄人也奚足與辯後鄉

豪竟以此僮禍其家丙午桂臣舉于鄉公益勵志學問誓必自酬夙志年逾六十或卧病猶手不釋卷下帷講業經無滯義文無卮辭出其門二百餘人取科第者頗衆咸質行儒者往往以毛詩轉相授受不悖師說五嶺以南業詩者莫不習梁先生之學矣平生慈仁易直儉勤謙敬爲諸生垂三十二年凡遇大祭及聖節元旦冬至大禮先期齋沐肅恭將事罔或貌飾其誠心可貫金石質鬼神校師及友輩咸相敬重督學蔡公克廉張公希舉廉

察士行並皆獎賞八應鄉試竟不得一第以終嗚呼傷哉卒之日縣令以下咸哀臨其喪朋友四方至者誅奠無虛日門人皆總服治斂公生于弘治乙卯■月■日卒于嘉靖丁巳十月十二日享年六十有三配陳氏先卒繼配吳氏一子一女皆陳出女適馮子益子卽柱臣也孫男二人曰某某孫女一人柱臣仕灤州學正召入爲國子助教進大理寺評事遇 今上皇帝卽位恩誥贈公國子助教葬于某山■之原大任曩以里中子爲博士諸生從公後侍鉛槧最久知公頗詳茲柱臣改南京大理寺評事過廣陵也屬任狀公行謹摭錄如右惟太史先生賜之銘焉非惟梁氏之幸亦嶺海斯文之幸也

明贈文林郎合肥縣知縣隨齋余公行狀

公諱世亨字文通其先建康上元人也元仁宗時有能舜公游宦嶺南之韶繼入廣卜居馬岡今遂爲順德人曾祖某祖安咸隱居敦行誼名聞郡中考直博學好文精于書法補郡學弟子員妣陳氏

生公五歲失怙陳夫人和丸斷機以教無異嚴父
遂日有所成立童年卽英英見志氣就外傳不喜
治舉子帖括語通儒墨釋老方伎術數及稗官野
史無不蒐羅貫穿日臨二王帖畫則專師沈周鄉
先達梁文康公一見以奇士稱之顧益喜俠家人
生產一不問也故業稍落以善醫補邑訓科值藩
司有部運之役視諸屬中非公不可遂領運入京
兩邁盜與兵于途官貲盡掠乃捐家資償之而業
益蕭然矣公不以爲意也于是恣情遠游足跡幾

遍天下京師貴近愛其才奏授冠服竟拂衣去所
交皆一時名卿如尚書吳公廷舉王公瓚胡公森
徐公問張公鏊先後折行輩與公爲友而唐太史
順之任考功瀚段民部子辛郭山人詡沈山人仕
則詞翰相契納最深中歲南歸卜築粵秀山下有
隨時草堂浣俗亭惟書數百卷古圖畫彝器度列
其中危坐諷覽以爲意得四方持絹素求詩索書
踵接于門藩臬守令往往降禮其廬郡中諸老先
生居閑者陳京兆祐卿黃宮詹才伯張總戎天祐

何方伯子魚黎侍御一卿李中丞稚大何太僕善
充趙憲副仲履何庫部子時蘇黃門幼清莫不延
請爲勝游處士則李子長蔡國賓與余先君皆公
之密交也當是時公之舊游平江伯陳公珪大監
馬公廣出鎮嶺南至則首訪公鄉人欲有所關說
公峻絕之二公以機務相咨畫公亦笑而不答雖
黎羹衣褐或不給而弗能脂韋於俗爲膏潤計其
故態如此余友陳子公載黎子惟敬輩結社賦詩
爲粵中倡公欣慕結托時已病不能出矣卒于嘉

靖己酉五月二十五日距其生成化壬寅某月某
日享年六十有八公配陶氏方伯三廣公魯之女
也公在髫鬣魯奇之許妻焉雅性儒素不以絢綺
驕其夫鞠育妾之子女恩愛最篤仁慈勤儉遭家
中落幹蠱之功爲多享年六十二歲無所出生于
成化乙巳月日卒則嘉靖丁未五月二十四
日也次氏生女一人嫁同邑羅彥綵次張氏廣
州前衛千戶文女生男二人嘉詔嘉誥女一人嫁
南海學士蘇兆文嘉詒舉嘉靖乙丑進士知合肥

國朝詩文集 卷之十一
縣 今上登極之二年恩贈公如其官蓋異數也
公挺山澤之姿而好游如禽慶負俠烈之氣而遁
迹如梁鴻礪鄉閭之名而躬行如陳寔修恬淡之
業而撰述如偉長所著有佗山人集四卷紀游錄
二卷亦足以表見當世也已嘉詔今爲監察御史
巡按畿輔公之福祚誠未艾云余夙從游好知公
內行頗詳因御史君之請謹備列之以告立言君
子

程母吳孺人行狀

歙長源里程太學伯賞郡中知名士也其配爲吳
孺人云孺人歸太學一紀而卒有子烈卿方四歲
當是時卽甚念孺人然制于父母終不得以私厚
其故婦及烈卿長時時聞王母諸母誦先母之賢
也顧時時私識之一日跽請于太學曰先母事大
人有年具有內勤嘖嘖在王母諸母齒頰間不于
茲有所撰述異世曷有知吾母者願大人命之也
言旣泣數行下太學哀其志稍爲烈卿談其母行
事曰請于當世鴻筆庶傳有永子之事也慎儀圖

之無何烈卿從諸生授易爲余門人從其父指請
予狀其母行予嘗聞新安人多故族世講家法無
論丈夫子卽德在女婦多可稱者矧程吳著姓而
孺人之賢有辭于室老其可不傳孺人以嘉靖戊
子六月十四日生于石橋里歲壬寅年十五歸程
明年父母俱物故時王姑舅姑具慶堂上憐孺人
孱弱息女爲婦復無外家恒以女視之孺人顧早
夜勤事曰妾以母命業已爲程氏冢婦中門以內
孰非婦事何得以孱息辭卽二姑憐我如先母命
何不幸蚤失父母所恃者二姑耳奈何以媮媚故
傷炸氏心凡事事輒先家人家廟時祀宗親問遺
輒啓白二姑而後行事每上食姑前輒親奉匕箸
時其饑飽而食時其燠寒而衣無時遺老人憂儼
然一健婦也又能時語其夫曰夫人咸恃盛年而
業不成盛年無以爲也要使褪身績學遺父母令
名卽兒女子亦與有榮彼依依何以也乃程君從
博士學學成顧修古文辭以稱詩名而門外屢跡
多四方賢人孺人益自喜曰夫子之業成在是矣

國朝詩文集 卷之十一
故客過輒爲治具俾太學得善事客學日以廣孺人相之也乙巳舉子不育孺人痛自念曰娶婦本以廣嗣以妾之不德嗣之不立非夫子祇承宗祏意也乃三年齋戒禱于白岳之下踰年辛亥而舉烈卿舉室胥慶謂孺人至誠感神果有良驗孺人不有其勞以爲程氏祖宗之靈翁姑夫子之誼上通于天乃令程氏有後巾帷之妾顧何功之與有乙卯又有娠以產子致疾不起家人請訣孺人曰修短命也妾執贄爲婦亦既有子足以報程氏先姑及吾母于地下獨憾不能終事二姑耳願夫子無忘宗事善慰而二親無以婦人故傷厥心早圖繼吾室者善視吾子卽妾不死矣又執子烈卿爲嗚嗚之語時烈卿孩提不復能記憶也孺人卒在是年九月十七日年僅二十有八再踰年而所產末子又殤今獨有烈卿娶汪氏孫堯慶堯庭堯度繼孺人室者爲汪氏又卒繼方氏有次子曰烈鼎烈輔乃烈卿每道其母事輒嗚咽不能語可謂盡思孺人賢而無年乃有令子不啻黃髮矣

程母黃氏碩人行狀

歲丁丑余從國子先生後休寧程生秉武入太學相從二年所碩人甚思之趣其歸奉顏色者甫六月而碩人以疾終秉武復來京師縗絰詣余泣且告曰先母弃不肖孤無他囑願得質言狀其始末庶銘者有稽然閨禕之細行不足辱先生微先生言海內二三作者無所徵信也惟先生圖之按碩人出休之龍灣黃氏某公仲女幼務蠶績勤女紅履不出閨相旣嬪于程夙夜衿鞶不忘敬戒處士

宜之顧以嗣續爲急因爲處士納妾氏於是俱蕃育十女其待側室撫諸子最有恩而不爲煦煦態每曰小星之惠雖在逮下而女君之禮我不敢廢鳴鳩之仁雖貴均壹而義方之訓我不敢忘其家人事之儼若弟子之於嚴師傅也上事舅姑孝敬惟謹舅喜賓客周問遺膳羞筐篚碩人所經畫咸中羸縮之宜而其服食衣不完采盤不兼味所待臧獲皆使飽煖鄰里有不足則隨力調恤內外一無問言當處士出時常脫簪珥佐之自總家

政訓率諸子諸婦勸以不匱處士無內顧憂遂積累饒裕廼築室構室祀祖父之業幾甲閭左矣猶日訓諸子諸婦如故也歲時召立堂下戒之曰吾家起自涼薄甘苦備嘗今幸稍給顧敢忘貧賤吾所以早起夜眠兢兢力作者豈好勞哉勤儉爲起家之本怠侈爲廢業之階爾等念之鄉黨姻族聞者傳爲內範凡浴兒嫁女娶婦必請主其事曰願吾子吾女吾婦若程母之賢孝多男子也碩人旣相處士拮据成家猶欲以儒業光大門戶是歲萬

曆庚辰五月資遣秉武卒業太學秉武婉戀出自天然六月初十日碩人遽不起距生嘉靖丁亥九月二十二日年五十四耳子六人女三人長秉道庶出娶洋湖孫某仲女次卽秉武碩人出娶倫堂朱某季女三秉賢庶出娶倫堂金某長女四秉文碩人出娶龍灣黃某仲女五秉彝碩人出娶五城黃某仲女六秉禮庶出娶五城金某仲女女轉弟行一適倫堂黃某二某意弟行二適溪口葉某子某皆碩人出映弟行以適龍灣黃某子某者則庶

出也孫男懋德懋忠俱秉道出卜以十一月初五日厝碩人于遐園之陽窀穸有德蓋慎于襄事乎哉諸皆其武哽咽若不能出諸口而余稔聞于休之丈人長者爲得其詳謹述爲狀若夫闡幽發微在乎志而銘者焉

歐虞部文集卷之十一終

歐虞部文集卷之十二

嶺南歐大任楨伯著

碑

報功祠碑

上之八年九月資善大夫戶部尚書鍾陽馬公薨于家九年七月閩縣候官縣耆民齊道正鄭汝學周桂和等百餘人匍匐言于臺院上官曰昔嘉靖壬戌癸亥福州三衛軍鼓譟爲亂一擾於教場之團練再譁于藩省之清糧當是時倭奴窺海上

閩方戒嚴客兵且驕悍狼顧衆慮內外勾引主客
潛通會城震虢莫保朝夕父老子弟萬衆請公慰
撫公兩出諭之衛軍羅拜翕然歸營此其功存于
城社而恩溉于桑梓者也公今逝矣輿情尸祝日
切于心願得官地一區請以私財建祠報祀上官
從其請畫平遠臺旁之古壤左望鼓山右望旗阜
譙樓峙其後前則大江通于海釣龍臺在焉工皆
子來鑿石畚土輦木運甌越兩月而祠成堂室廡
序處漏垣墉百爾孔備額其門曰報功於是卜日

協辰父老子弟奉公像貌虔修蒸嘗之祭薦紳逢
掖喜斯祠繫閩中萬衆之心也中書舍人袁君表
自京師貽余書屬爲之記余惟公曩事 世廟敷
歷中外則功在方國及事 穆宗會計謀謨則功
在廊廟請養還山十三年而終 上之恩賜卹典
誠不忘其功也是舉犹鄉人父老子弟之心非所
謂鄉先生歿祭于社之禮耶嗟夫庚桑楚之居畏
壘三年大穰畏壘之民且俎豆之矧公之捍大菑
禦大患功在閩井並合祀典宜乎鄉之人之不能

忘矣余不佞何能載筆謹述祠事所繇勒諸麗牲
之石告于百世

程母項孺人貞節碑

孺人蓋歛托山處士程濂之妻休溪陽處士項帥
之女也休歛雖異牧而托山溪陽接壤故二姓世
爲婚姻云孺人旣笄而歸修其婦事佐而夫子則
友其兄夫死于客訃來數千里外孺人痛哭欲絕
謂有孱子弱女可延宗祏以未亡人之軀復何所
惜茲遂同歸之懷無裨翼子之業爲一婦人之死

重傷處士之名卽其心著如皦日而身輕于鴻毛
矣迺破涕斂哀盡出奩中裝屬家人爲夫子歸其
旅魂托茲首丘孺人屏去膏沐閉閣自守歲時一
拜尊章非有期會雖妯娌姊妹未嘗爲一宴見程
故敦尚禮義而伯仲間念孺人節婦事之益恭故
無用歌魯寡之鵠毀令女之面享有令名自非之
死靡他何以有終哉子懋仁少嘗從俠少年游孺
人告仁泣而數之杖之于庭仁由是感悟遂爲孝
子今旣孫而曾矣女亦適名家爲佳婦孺人生二

十二年而寡六十六年而卒郡書其事于志題其坊曰貞節其叔子懋易率冢孫烈文請于予曰曹娥至孝尚須黃絹而傳永姜雖貧亦藉碑旌而永伯母貞節載在家乘非托金石何以昭示來葉願因先生計可者歐生不忍辭而遂爲之銘銘曰歟有長源惟程是望豈其娶婦必休之項思古碩人考槃偕老豈不百年乃捐中道哀哀所天自名未亡念彼弱息存此宗祊子承手澤女奉母儀內外允則白首孔怡宜爾子孫振振先世無慝九原

大賚來裔郡書厥事縣表乃墓金石不渝胡爲朝露

敕賜廣濟寺碑

夫天地覆載陰陽遞遷明則有日月幽則有鬼神百億閻浮固塵沙之靡竟大千世界實劫數之無窮自非璣衡流轉孰測天樞章亥步馳寧知日馭徒仰穹蒼之色俟八鰲之運而已此布算所以必資於隸首迷途所以必待乎指南也若乃九土衆生四流五結遷延愛欲累惑淪沉何異操朽楫于

苦海坐積薪于火宅泡沫相催風電易息是以投
溺于人心與開物成務並功濟生于世諦與扶顛
夷難同德事詎有二乎哉如來出世道冠百靈心
涵萬類行圓四等惠普十方於是然智慧之炬以
出五陰授清涼之藥以脫諸苦標三際之真以破
結習汎八解之流以示洞悟猶且發廣大心闡玄
微旨開方便門示真實相法行無外化現無方固
已納滄海於一漚置須彌於葶藶矣寶牀湧地以
來檀車泥洹之後舍利八斛浮圖競高婆羅千人
香花更洗那竭積薪殆遍分於凡聖矧寶瑞像亘
常住乎古今所謂由自以會心卽心而卽佛者也
廣濟寺在都城西北始于我 明成化乙酉神宮
監太監劉公嘉祥卽賜宅建爲崇化大應法王下
院尚膳監太監劉公祥內宮監太監高公通等三
鳩工而成請于 憲宗皇帝敕賜寺額令法王弟
子扎失列住持定方宅勝負倚千雉之城開徑通
幽控帶三條之陌優闡雕木于忉利天波斯鑄金
是轉輪地奚但二龍吐水遂名迦維之居一馬馱

經始表洛陽之刹哉斯寺之再興也在 世宗皇帝辛亥之歲時則司設監大監孫公保請寶藏大師主之乃披榛薙草力紹興基支棟扶梁役同經始先治墻垣遂營方丈大佛之殿則修於隆慶壬申藏經之閣則創於萬曆乙亥東西有室專集講誦左右有廂爰潔廚庫祀更新寺門并鐘鼓樓天王殿祖師殿伽藍殿兩禪堂而碾磨之房棗樹之園皆附麗焉山庄在德勝門外鷹房裏嘉靖乙丑所置也草菴一所花竹環植寶塔一座鈴鐸四聞卽其淤以爲蓮池就其腴以爲蔬圃稻麥之地則七頃有餘給徒飯僧胥贍此矣大師姓劉氏法名能蠲系出河間獻縣十四出家投大千禪師受具足之戒二十游方訪大川禪師究性命之理南抵伏牛北造靈丘寒暑不移險阻不避忽遇通天禪師指示因聞鐘聲而說偈言復走終南崖居穴處者八年堅修苦學常澗飲而木餐善證神通或鹿隨而虎狎久之入都事龍華通講主崇壽秀法主徧歷講筵大相印證都人士迭來咨叩莫不虛往

實歸緇素咸推爲白眉矣其徒二人長曰仁平次
曰仁義長孫智端曾孫慧永玄孫本江大師與慧
永來請余記余惟境無非幻論學必究於真如法
本皆空度世必資於色相是以性等摩尼而朗照
於六合心惟一月而普現於千江衆生界卽諸佛
界也迷則爲衆生諸佛心是衆生心也悟則成諸
佛嘗觀大師所說偈蓋得於悟也始以悟而成學
終因悟而濟人闡半偈之密義沛若江河成三摩
之妙因屹同宇宙余也三乘歸佛徒許鵬耆半世

爲儒曷稱調御庶幾不朽謬托頭陀之碑豈曰無
人但愧韓陵之石不揣蕪語載刊貞珉銘曰

浩劫無始荒芒孰開恒星曾隱大地未灰天上天
下是生如來肇造千億拯茲昏哀永拔三界咸際
九垓雙樹將息八風若摧獨傳象教示祇洹軌山
引鷲峰河通鵠泚遡源似遙望道伊邇王舍城存
阿耨池啓祇園葳蕤給園藿靡花淨露澄月白波
起靈獸般舞韻鳥戾止仁祠有赫千秋莫毀天眷
盛代佛日方昇刹臨紫陌閣覩珠陵敕額廣濟大

師代興導之寶筏照以玉繩璧缸夜燦銅鑰晨扃
鼓鐘在列龍象堪乘西來翻譯大藏諸經坐叅奧
義彼岼先登梵音寥亮鏡影圓凝高懸戒鐸永傳
法燈津梁未倦門徑咸升煌矣上京在周爲鎬東
青峩峩太白顥顥地表沙界神爲富媪招提維新
爰有僧寶十地皈瞻並進此道蒼荀風香扶桑日
杲金石不磨德山斯保

貞節祠碑

新安太學生程懋易狀言懋易家從長姐明威將
軍衡山公之女母爲許夫人姐生於嘉靖丙戌十
一月十六日幼侍親側跬步不出閨門於泛醴治
膳操縷刺繡未嘗待學而能姆或教以孝經列女
傳則朝夕諷翫許夫人鍾愛之擇壻得潭渡黃生
時芳姐未笄而姑病亟黃生年始十七割股進療
幾殆急逆姐歸偕理湯藥姑病倏愈人稱孝感事
在郡志中姐年十九黃生客死訃至哀號勺水溢
米俱絕殆不欲生已而念儻遺腹得男庶幾不廢
宗祀竟舉一女未周而殤姐所以椎心而泣血也

三年喪畢諸保母有以姐年少新寡家窘且無子
稍稍微言以喻姐知其意慟哭唾罵曰吾夫爲孝
子吾不可爲孝子婦乎吾受訓父母生死黃氏門
耳一失吾身他日何以見孝子于地下於是屏去
簪珥日閉一室每展黃生敝書蠹卷聲淚俱下然
家徒壁立許夫人常致薪米衣絮歲時不匱三十
年一日也許夫人春秋高姐年亦五十始一歸寧
與許夫人同卧起奉七筋勞瘁年餘復遭瘧疾跪
白許夫人曰兒不能終事母矣脫有不諱幸早一

日從黃生乃返黃氏而卒實萬曆丁丑三月十二
日年甫五十有二宗黨鄰里無不歎悼稱姐全節
上其事于有司求表宅里姐之弟曰杰曰業撫其
柩于里之橫山啓黃生壙而合葬之曰采方任平
樂府事歸益悲慟念許夫人思女邁閔哀深乃建
祠高甸之陽祠凡三楹前門後寢繚以周垣奉姐
祀之歛令李君躬致奠醑題曰旌揚貞節祠因以
名云懋易與二三兄弟恐彤管未彰徽音易泯不
敢以衡門側陋泯寡姐之貞風也余聞秦築女懷

國風音義集 卷之十二 九
清之臺梁表寡高行之宅國有彝章所以勵世程
氏斯祠貞婦世食其維繫世教豈眇少哉爰爲樂
曲俾升歌以祀其辭曰

率山嶺崔兮揚之水兮淺且清魂歸來兮乘采蚪
穆竝騁兮燭龍停金支兮翠旗蕙帶兮荷衣父母
鞠我兮胡然遠之長原有宮兮堪宴娛巫咸屢舞
兮何來遲涕潺湲兮我心悲 右迎神

江雲兮嵯峩江雨兮滂沱泛泛兮栢舟蕩蕩兮中
河玉轉舉兮綵霞瑤檝漾兮白波蕙蘭蒸兮勺藥

龠琴瑟奏兮管匏歌駕泰鴻兮騁高駝望烟霄兮

愁奈何 右降神

奠桂漿兮芳椒糝瑤席兮列繡黼衮不留兮悵
容與考鯨鐘兮伐鼉鼓般姚姚兮裔裔宵冥冥兮
衙衙心恂怳兮何期倚洞簫兮吹參差春有蘭兮
秋菊薦終古兮渺予思 右送神

歐虞部文集卷之十二終

歐虞部文集卷之十三

嶺南歐大任楨伯著

墓誌銘

明故文津處士墓誌

大任之三伯父曰處士公卒已十八年矣嗣子應軫貧不能葬嘉靖三十四年十二月十六日大任率諸弟大鈞大謨大猷奉公之喪祔于大崙山先墓下應軫徒跣叩頭謂大任志之嗚呼大任忍執筆志公墓耶而不可以泐歿無聞也公諱季元字

以仁考爲將仕佐郎府君適妣黃氏安人而妣安人盛氏生公于成化癸卯十二月二十四日性鷲急倜儻豪宕童時矯捷不羈綴幡騎竹指使里中群兒里中群兒咸伏其下又好黏竿打蜻蜓善射生日獲烏雀以百數將仕府君以其有奇氣時時折辱之不可下十一歲盛安人卒十三歲將仕府君卒益喜任俠使氣勃勃不可近伯氏怒罵之曰先君鄉善人也隱于醫弗耀然里中稱爲長者而可忘先君家訓弗思所以亢宗耶公乃折節讀書

與姪弘從叅議何汝璧先生講易于山寺中夜半篝燈誦讀弗輟督學丁公璣選爲縣學弟子員會御史行部過縣師生皆出郊跪迎公憤曰士而可賤若是耶吾不能低眉屈膝以事尊貴人也遂拂衣去竟引疾歸歸則卜築赤花洲上焚香掃地懸先聖像朔望叅焉日誦經史以自娛作爲詩歌成輒削藁居常少出暇則招邀親舊賞花飲酒意訢如也歲輸徭賦率先閭里嘗曰含哺鼓腹伊誰之賜出租稅以給公上非庶民職耶諺云欲要寬先

了官卒無逋賦鄉人翕然稱之縣丞尉以職事至鄉咸禮其廬所交皆賢士大夫鍾知縣萃鍾御史善經麥長史瑩何御史沾皆以臭味相合而鄉進士鍾君善言陳君道潛尤親昵也嘗有權勢之兄欲訪公使人致禮公鄙其人標使者慢罵之時權勢方不次入相其兄怙強凌轢奪公水亭別業公屹不爲動比權勢兄弟相繼卒別業竟歸公焉平生喜施予濟人不瞻拯人危急雪中出見蛋子饑寒者卽解衣予之給以斗米乞人至門無不蹙足

者鍾君嘗設義倉于其鄉遣書貸粟以爲子本公出穀數十石以助之鄉民何果定等十五人漁于海游徼捕之以爲盜不堪箠楚將誣服矣公以爲寃率鄉耆二百餘人奔赴新寧言于上官竟活十五人之死命然終不伐其德史稱郭解厚施而薄望振人之命不矜其功以公視之何如耶公晚年猶好讀宋儒諸書不喜佛老戊戌三月卧病旬日氣上衝痰益壅猶正衾加禮服其上大任侍側賓客問疾者至公視地有唾痕速命覆之聞子弟祈

禱于神力禁不許病將革大任跪問遺言公曰爾
在吾何言我銘旌宜書曰急性寡合學業未成歐
文津之樞命大任記之且戒勿作佛事云子夜將
屬纊矣而日未暝呼先府君握手而訣乃暝卒之
日四月初五日也享年僅五十有六耳配江氏有
子三人長應辰先公五年卒次應奎後公十一年
卒次卽應軫嗚呼孰爲公瞑日後一至此耶公無
他腸惟嫉惡太嚴氣剛難近耳其諸盛德事舉無
愧鄉評天道有知猶當畀其裔日昌以大也顧家
運中衰後嗣零替尚謂有天道耶大任痛伯父體
魄之未安而善行之終泯也於是始克襄事乃志
其概于墓中之石云嗚呼張堪任昉世之所謂有
道君子也而後嗣無良家聲亦墜然則公何恨哉
然則公何恨哉

吳伯舉妻羅碩人墓志銘

碩人諱玉容字

歙西呈坎人也新安名族盛

稱羅家郢州鄂州文著宋代貞德之裔必有女宗
慶門之遺篤生淑媛碩人端靜柔婉弱質天生組

國朝詩集卷之三
三
紉烹飪幼能自性姆訓女誡經口授于母慈閨行
闡儀仍申教于師氏及乎六禮既成三星告吉乃
歸于同邑溪南吳時英焉作嬪夫子琴瑟在御饋
食舅姑槃匱必親傷適姑之弃養誓齋素以脫幽
苦侍王姑之久疾執湯藥而滌厠踰旁接妯娌冢
室弗矜下撫妾媵樛木曲遠斷機勸學庶幾樂羊
之婦大布荆釵宛矣少君之風絕葷致瘁投劑罔
功有德無年傷哉命也春秋三十有三卒以隆慶
戊辰五月五日未卒之三日男孝久生于揚州蓋

妾某氏出也碩人不及見矣二女叫號高堂隕涕
閭巷惋惜僮婢噓嗟夫玉簪鳳折巾上留香寶鏡
鸞孤奩中分舞豈非壽穀之或爽福善之無徵歟
鮑妻沉悼明遠傷逝以嬰哀劉婦淑貞彥升銘幽
而題碣其辭曰天道無知碩人斯喪璧毀芝焚委
于泉壤松栢風悲丘陵烟愴灑泉在前白雲在上
下馬讀銘千秋惆悵

清溪居士歐公暨配鄭安人墓志銘

我歐之先金陵人也唐末之亂播遷嶺下宋建炎

初提舉府君端始自雄入廣至公十五世矣高祖諱思本曾祖諱祖華祖諱宗池考諱瑤妣黃氏實生公公諱惟綱字德張頎然雄健弱歲卽有丈夫氣性尤介直身布衣而然諾重于里中與家人約衣食必田畜所出租課不畢身不得酒肉蠶桑絲未賦家不得裘葛邑令屬爲稅長每代匱者先輸計入則匱者多持子錢酬公辭曰余豈筭織畝而不振諸君之急哉以此率導閭左後有賦里中競先輸矣家族或爲惡少所侵凌奮身當之曰德張在敢輻輳耶遠近以急難來告則千里捄人于阨與人刻期風濤雨雪必赴也出則裝齋整辦寧節縮飲食路逢窶子卽數十人人贍其不給歸則垂橐入矣公爲冢子恒幹蠱代勞趨事父母能婉容愉色旦率婦子奏膳然後敢食及喪葬一依朱氏禮友兩弟德美德振怡如焉子姪侍其側則無不嚴憚之者鷙急不能容人見陰險螫毒擊之惟恐後而匱者阨者誠誦義無窮時家溪上稱清溪居士云卒于嘉靖癸未五月十五日距其生于天順

癸未八月三十日享年六十一配鄭氏有婦德生于天順庚辰九月二十七日卒于嘉靖戊戌五月初二日年則七十九也男一廷選女二壻韓車富周秉義側室周氏男二廷詔廷諫孫男六仕禎仕祥仕禮廷選出祥先卒露廷詔出林潤林聰廷諫出孫女五出廷選者適崔大賓出廷詔者適黃亞潤出廷諫者適何某餘未聘曾孫男八一成一賢一貴一明夢龍夢賚善能善學曾孫女六一適黎某餘俱幼甲寅正月初一日廷選奉二柩葬番禺大崙山六世祖墓左今二十年矣大任始克追爲之志而銘焉銘曰
崩厥在田急于公兮虎豹在山彊于宗兮冢則寧隆兮永卽乃宮兮

明處士澹齋歐公公合葬墓志銘

公諱惟常字德美姓歐氏順德人其先金陵人也高祖思本曾祖祖華祖宗池考瑤奉詔輸粟助邊授將仕佐郎妣黃氏生公于成化辛卯二月二十七日卒于嘉靖甲寅六月十一日享年八十四歲

配伍村葉氏元旦第四女生于成化壬辰十二月初十日卒于嘉靖戊申十二月二十八日享七十七歲己酉正月十四日卽葬番禺山頭園壬向之原又十年己未十一月十七日公始合而窆焉男四吳忠吳志吳恩吳憲而吳志早殤女一適衛世恩孫男四用霖益香用揖崇禮女二適關越張偉訓曾孫男八夢震愛民正民宜民和民同民興民成民女三一嫁林三枝餘尚幼公長身山立冠服修潔德性冲粹孝友天成將仕君嘗患背癱時公

手亦瘡以悅懸瘡手而一手滌癰傳藥蓋非公侍疾弗悅也妣卒幾八十公亦四十餘矣哭爲嬰兒啼終喪哀戀如一日喪將仕君亦然事兄撫弟敬愛兼至督修始祖太宗小宗祠墓計畫綜理悉其心力族二千人翕然歸其功先是從弟德宏氏糾宗族正閭里郡邑署爲鄉三老子弟無不率教者一時以爲陳太丘王彥方不如也旣歿而宗人違訓戒者漸衆鄉民亦無所表率曹守將以屬公公歎曰蟹匡蟬緜吾敢望德宏哉而人人益長者公

矣癸丑歲饑方令行賑村中公首出貲助餽粥方下車禮其廬諸生欲舉其爲鄉飲賓力辭乃免踰年春敕吳忠等爲棺斂具曰先將仕君以八十四終今屆茲幸矣是吾啟手足晨也及夏果卒嗟乎余讀太史公書所稱長者多任俠奇詭惟東陽張侯建陵衛侯御史大夫張叔中涓石君家孝弟恭謹出于天性不言躬行雖齊魯諸儒方且遜之長者固如是今觀于公未嘗鶩奇節爲名高恂恂行誼配亦合德白首無間且澹泊終身自號澹齋無愧矣隆慶丁卯吳忠等以姪孫懷忠狀寄余廣陵屬銘公墓七年于茲念長者之風日遠也于是列所睹記按狀并志之銘曰宗之老兮漢長者山園歸然曰下馬佑爾子孫以純嘏

明處士樸翁陳公安人潘氏墓志銘

陳公諱德重字世恭生于弘治庚戌六月二十五日年四十有九蓋卒于嘉靖戊戌八月二十一日逾二十八年丙寅正月初四日始葬莊邊岡之原時余留滯京師夏歸謁公墓其月趨廣陵隆慶戊

辰家人以狀來屬余爲志乃今萬曆改元余光州
奔喪歸之踰年也于是志之而刻之石嗚呼公余
外舅也生不獲拜公牀下歿不及含葬不及緋乃
余今忍銘公墓耶按陳村南雄沙水村大井頭人
也先不知所自來初祖浩澄宋紹熙進士爲蒼梧
郡教授有司籍僞學方急弃官游南海遯西樵寶
峰下慶元初卜鼎安都伏隆村居遂占籍南海門
人稱爲隆隱先生云二世宣義郎洙三世大理評
事皇華四世朝議大夫願真皆有宦蹟于朝高祖

貴霽曾祖昕祖冬蔭考觀道咸隱德不仕妣郭氏
繼黎氏實生公體貌魁岸質性顛直讀書不求甚
解然篤行誼弱歲遭考妣喪摧毀骨立居常哀思
以不得承權爲恨書遺訓佩服終身伯兄德禎季
弟德厚俱長殤營葬同兆域囑世祀焉遺產歲有
租入二千餘石仲兄德祥專掌踰十年左右多構
讒隙曲譬勸分公曰家事任長敢別籍異財乎吾
誠不能以尺帛斗粟傷吾兄之心也親黨貸數百
金終不責償時時猶問遺不衰歲暮出取逋欠折

券市義馳一空騎歸里人望而笑之顧揚鞭權甚鄉人有鬪戒家人閉戶佐饗得嘗佐鬪得傷每三誦焉從子奪公魚塘面相抵觸族老謂卑幼犯尊長罪不容追矣一不屑較退則齟齬酣睡從子因族老蒲伏謝怡然如初生平足跡不至城府浮沉閭里未嘗問朝政世事門庭苔蘚田畝早潦絕不督治僮奴亦不相關白醕嗜醪醴樂放縱惡檢束岸幘箕踞聽松撫石從之飲者必浮白引滿相與掀髯撫掌衣無綺縞冬夏一大布衫而已醉則席地卧人知其無底裏陶然任真號之曰樸翁公亦沾沾自喜一夕大醉盜數十人劫其所有復舁之而去家衆百道尋覓翌午見公披髮逡巡還具述賊語爲奪粟捄饑事非得已震驚善人懼違天道因指送歸路仍飲之酒當是時族人方捕殺大夥賊衆爲公危恐甘心于公以報仇及公還衆莫不懽呼有天道焉配潘氏同邑潘天麒女佐公以端謹勤儉每泣不及事翁姑歲時烝祀豐潔朔望供盞不親濯不獻事宗婦謝如子媳之事女君也初

艱于妊育偏信祈禱里婦貧不能自給者輒推食與之臧獲則待之以恩三十外連舉女若男撫之最慈而無所姑息箴紉書史親爲教訓女若男故咸有所成立嘉靖甲午三月二十七日卒距其生弘治壬子七月二十一日年僅四十三歲男五仕任仕儒仕俊仕儲仕儼女一嫁大任者是也繼配張氏生女一則嫁杜漸萌孫男十六任出者曰所守所能所立所思儒出者曰淡澄潛湛淵俊出者曰海瀛儲出者曰澤演滿儼出者曰濤汪孫女六壻爲勞元皞鄧希禹餘未字曾孫男四光祖光國光前光宇曾孫女一嗚呼賢不可必壽老不可必偕公與安人儷德偕隱年皆不足五十天道謂何蓋棺後女若男幸不墜先訓孫曾蕃衍後必有顯者孰謂無天道哉孰謂無天道哉銘曰嬋媛大姓系出潁川庾關播越南海星連處士貞晦龍偃在田桔槔不理機息智捐沉冥不醒神逸天全樸者道茂埋玉雙駢松柏沃若永賁斯阡視我銘詩曷不萬年

處士滄橋汪君暨配金孺人合葬墓志銘

汪氏魯公族之後也漢龍驤將軍文和始渡江遷新安至唐越國公華著矣五代時御史大夫瀆自新安遷婺源之大畝御史曾孫子輿自大畝遷休寧西岸子輿立孫森自西岸而遷遐阜森之孫文翮又自遐阜而遷洪方是曰洪方汪氏云 明興有新淦令志道志道生春和春和生雲生雲生生文炯娶于潭許氏實生處士處士諱堅字尚節爲人孝友遇事慷慨嘗客太康故所識侯進貸二十

金業已許之人謂進孤貧且老異日不能償也處士曰吾固知之脫責其償卽不許之矣竟與之終不索償族子申數請贖於處士積逋已多書券以家人故居爲質處士不受曰奈何吾以餘財奪子世業耶徐大爲處士紀綱僕主出納損二百金匿芻縣數年處士過淮陰徐大衣敝衣忽特壺漿蒲伏舟前自列前無賴狀叩頭謝死罪處士畧不譙讓仍憫其窮與二布遣之世謂賈人率射利忘義處士顧秉高世之行終其身一字不入公府賈人

有是耶金孺人族出梅結歸處士時操井臼備旨
畜節其羸而用其仂肥甘之味纖麗之服口不敢
嗜而身不敢御也諄諄以勤儉諭子女而歲時問
遺姻族無廢禮處士與人持論侃直孺人善以柔
婉調劑內外益以惇睦新安多山少田卽無中人
貲大半以末富處士行賈江淮南北數至千金數
破於寇嘉靖中載木棉七萬於瓜洲值倭奴縱火
延燒殆盡所燼餘者尚可收百金也處士弃去不
顧歸對孺人無愁歎之色夫陶朱公三散千金而

客爲孟嘗君焚券市義處士好行其德固勝二子
矣處士生于成化乙巳十二月二十九日卒于隆
慶庚午十二月二十三日享年八十有六卜新阡
遐阜長垣園葬於壬申十二月初八日也孺人生
于成化丙午十二月二十九日卒于萬曆癸酉三
月二十日享年八十有八卒之踰年甲戌後十二
月十四日祔處士而右子男一魏女二壻爲臨溪
程文法商山吳暉孫男三冲準凌孫女一壻爲遐
阜程子喬曾孫男四秉正秉德秉善秉彝皆冲出

國朝文獻通考卷之三十三
曾孫女二一則冲出一則準出也余曩聞處士之行誼於吳鴻臚繼茂而鴻臚則謂余曰史家侈述薦紳大夫之業閭巷之士卽扶義俶儻多闡坳不傳矧及婦德先生能無慨於中乎於是魏遣冲奉邵太學正魁狀來請銘余不能辭也銘曰行也事其質而不事其華才也不用於國而用于家名靡稱而沒世繫君子之嗟是爲滄橋處士之墓而余銘嗟嗟夫何恨耶

兩川陳處士暨配馮安人墓志銘

嗟夫世風非古剝朴爲彫民鮮淳質咄嗟久矣余每考論鄉之敦厚長者得兩川處士焉處士諱景豪字宗興姓陳氏宋紹熙進士隆隱先生之後世爲南海伏龍堡人處士五歲始能步履七歲入小學九歲善屬文弱冠習博士家言力苦佔俾山窓風雨燈熒熒然徒四壁立口不輟誦手不停披業遂通都講里校中宿儒每出其下正德丁丑巴山黃公弘署學嶺南選升郡學適奉父諱未及舍菜泮宮喪畢親友勸其卒業嗚咽答曰吾始欲補郡

弟子員爲祿養計也祿已不逮親矣進取何爲耶
遂遯山中潛心古籍吟諷自適事兄恭順怡然一
堂財產必讓不立券割毫無貳言臨子弟則端肅
處鄉黨則和睦同里黃汝祥踵門徵賦已立領折
色也遺白金數錠於坐匆遽而去遣力追於四五
十里還之時有諭葬方文襄之役里中當出夫徒
方氏與處士姻也爲之免役里中德處士斂貲以
謝峻却不受一僕病狂呼號於里謂處士糾賊行
劫族人乃談笑道之竟寢蘇村黃姓之毒謀家人

夜守瓜圃爲盜所殺鄰舍懼株連也則以江浦巡
司之驗而白焉其長者之行每每如此晚以齒德
推爲族中祭酒處士考古禮正宗法首建祖祠于
是族有所統非所謂施于有政者耶潘安人則以
內教佐處士事先以敬訓子女以禮處妯娌以情
撫僕婢以恩族姻無不稱儷德焉處士生于弘治
某年某月某日卒于某年某月某日享年八十二
歲安人生于弘治庚戌六月十三日卒于隆慶辛
未十月某日年亦八十二男二嘉謀嘉言女幾人

某某壻也孫男某某嘉言卜以某年某月某日合葬于某某之原余視處士內從兄也知之最深今益歎老成之凋謝而長者益不多見矣乃爲之銘曰淳風邈矣不可回儷德偕壽歸泉臺白日一閉寧復開後千百年下馬來讀我銘章且徘徊

明處士元齋歐府君墓志銘

府君諱惻字元卿我歐之先宋建炎初提舉文溪先生端自滇昌遷南海今爲順德人高祖季和曾祖潞祖瓚考端鳳是爲雲巢居士妣梁氏府君生

于弘治甲寅八月二十日卒于嘉靖戊子正月初七日年僅三十有五辛卯十二月初四日葬于青蘿山戌乾向之原時居士已老且精陰陽宅兆之術急襄事也府君性淳朴簡直勵志不羣弱冠卽代居士理家政故不能治博士諸生業家故貧始貨殖通商賈之利轉轂數百里贏得什一以織畝起世居陳村果布之湊客每齎貸子錢子錢家務積著持重府君與時俯仰亭貴賤無息幣欲其行如流水而然諾信於遠近十年之間其息倍之已

而力田與僮僕同甘苦審泥土燥溼辯節令早晚
晨起衝霧冒炎荷鋤秉耒督率並作赤日中汗淫
淫下竟趾終歲肄勤不言勞倦於是稍有益藏六
畜蕃牧仍折節爲儉薄飲食節衣服更徭租賦輸
納必先爲閭里率事居士與梁夫人色養備至朝
夕上食未嘗見不鮮居士祭先饗客每豐潔府君
承其志弗以歲之穰惡異其供具尤友愛其弟田
畜所入毋自私也閭里有所爭訟能以禮讓譬解
無不感服遇荒歉則出粟以勸富家共卹饑窘流

移多歸之府君年未艾而鄉社媵臘已推爲祭酒
矣先是丁亥冬府君夢一老冕衣裳者語之曰善
積而家流慶無涯一逢七五便爾升霞覺而喜且
懼解者曰公壽當七十五也獻歲家庭爲人日之
會府君無所疾病至夜就寢喘不可止索筆書曰
七五之數不能逃矣殆命也夫惟不得終二親之
養何以瞑目兒尚童也長當讀書力善毋忘吾以
元名齋之意有頃而卒府君配梁氏男學孔學程
而學程舉于鄉爲藍山知縣女適黃宗吉次子某

孫男達德達朝達邦女適黃叅議希尹次子某者
皆學孔出而達朝一名叔寶則番禺學生也達猷
達政達勲達善女適黃侯司長子某許聘蒙

長子某者皆學程出曾孫男兆蘭兆蕙兆萱皆達
德出府君善積流慶天道其弗爽矣夫學孔學程
謂大任曰先考就窀穸時惟有孺泣未能志諸幽
也知先考者孰如兄墓中之石惟兄圖之大任何
以不朽叔父哉乃敘而銘曰丘園貞士簡且質壽
雖弗延天已隲宜爾子孫世簪黻馬鬣之封閉白

日於萬斯年保終吉

楊母張孺人墓志銘

章丘爲濟南名邑楊張皆著姓張孺人父爲邑學
生一元母魏氏大父爲汜水令某大母劉氏魏生
孺人七歲而沒劉鞠育之愛其溫良純篤柔靜端
莊教之鍼繡烹飪無不諳曉而愛親敬長簡言慎
動若天性然其配于楊也因潞城令楊公某與汜
水交最厚重其家法遂委禽焉于是孺人年十七
歸處士公某祖考壽官公有繼室陳孀居祖莊數

年孺人左右色養未嘗不以女君之禮事之陳每稱孫媳婦賢處士公兄爲兵部侍郎以御史封潞城公鄉人右楊氏族貴盛矣御史公日游樂田園好集賓客孺人治滌灑必精潔咸當御史公意又無不時稱媳婦賢也處士公業農于漁張莊孺人佐之充拓產業修治田廬餼糲饁耕漚麻理絮奴婢力作時其饑飽節其勞逸鞭笞弗事而農桑百務井然有條先是里閭謂孺人內外貴族豈習田事至是耕者推漁張上農尊處士公爲閭祭酒而

孺人爲田家賢婦矣莊間多宗黨親姻井臼之暇所勞苦問遺無間于富貧疎戚其喪御史公與太孺人也殯歛葬祭不遺餘力侍郎邁禍于總督薊遼而家徙建安孺人每念丘嫂言及則簌然淚下處士公往視之孺人聞江南大水千里懸思廢寢與食旦夕露禱左股因感風溼之疾處士公歸始忻然樂已晨興處士公出行田或鄰飲及夕必秉燭危坐俟歸乃卽安三十年相敬如賓性尤勤儉一絲一粟靡不愛惜而周貧卹匱恒傾橐焉教子

國朝音義卷之十三
讀書給饋餉具束脩令其親師取友懶惰則加呵責手治諸女奩粧心勞病積將畢婚嫁而虛損羸瘦猶內政如常長男年甫游邑校次男壯甫舉鄉闈則喜動顏色曰家聲不墜忠孝立身勉乎哉萬曆乙亥春眩暈時作丙子夏左手足遂痿痺竟不起矣卒之日是歲六月二十五日距其生嘉靖丙戌七月二十九日享年五十一歲子二卽年甫壯甫女四趙正本謝孔傳李新芳霍養性其壻也孫男三啟運文運興運孫女二俱幼年甫等卜丁丑

二月某日葬孺人于漁張莊東南祖塋之次壯甫從余太學雅相善也具狀托其同年友劉鴻猷來乞銘余嘉壯甫待試南宮思母卧疾徒步歸省獲視含歛殆今之何蕃哉忠孝之訓必不墜于他日孺人之賢益可徵矣是宜銘銘曰岱宗之北長白西其草書帶腓以萋繡江源發清不泥世德作合表中閨張家淑女楊家妻有子雙奮冲雲霓漁張之原田似圭玉埋光燭奎璧齊倚嗟歸然兮後千百年視我題

德府典儀程長公暨配汪碩人合墓墓志銘

夫至誠如神而作善降之百祥以余所聞程長公汪碩人是也當長公口病數月諸醫不治一夕夢緋衣神人持七藥進而愈會次黃河半夜起見一舟過急呼權人解纜從之同舟人起視行舟實無有也固不欲發長公怒強權人呼邪許行行數十里黎明颶風作濁浪洶湧後舟皆覆無一人存者惟長公舟得泊同舟人相率羅拜以爲神汪碩人素無疾年將髦始患脾忽惺然坐于榻謝衆曰吾

日中睹有飛駕來吾將乘之行矣遂端默而化觀者莫不嗟異謂善人之報云萬曆甲申余在留都太學生程君懋益來求書長公碩人壙中之石詢其平生吉祥善事每符余所聞於是按斗城凌叅政瑄狀而志之長公諱冲字德昇歙西托山人出梁忠壯公靈洗後代有聞人載郡志家乘中曾祖用祥祖和皆不仕考有緣贈徵仕郎妣鄭贈孺人初徵仕卜婚得于飛鳳凰五雛昂蹠譽命煒煌奕世載昌之兆長公以元子爲家督謝博士業商游

青兗間家大起富能行其義族議建祠首出已地
爲倡鳩材僦工廟祔華整秩祀以禮性喜施予所
至遇道路傾圯津無梁者渡無舟者輒捐貲葺而
治之殆數十所里有早卒而遺其嫠孤者時卹其
匱久而不厭某子甲輩皆貧不能葬爲具棺槨助
以襄事客開河居停房廷秀善貨殖當長公心前
後佐之數百金終不責其償亦不以爲德游歸德
逆旅主人闔門病疫忽相謂曰程長公來若等其
無恙乎迨長公至一一周視粥而藥之應時俱起

周宋間莫不神其事德王聞其賢拜爲典儀竟謝
還山中汪碩人本海陽貴族爲程家家婦以嚴肅
儉素自持鄭孺人晚喪明代總內政夜籲天願以
一目揀苦孺人厲聲曰吾不願女代言獨願女代
視家耳碩人共祭祀饗賓客至於絲枲米鹽綜理
有條舉族萬指內外雍和無不當鄭孺人意者長
公久未子畜十數姬不受娠乃爲置副室趙氏而
生懋益愛之不啻離腹朝夕課書竟成令器其所
勸相長公施予賑給者歛人率能頌羨之此其爲

長公碩人之善事所以神降之祥也長公生于弘治甲寅十一月十二日卒于隆慶戊辰七月二十日享年七十五歲碩人生于弘治甲寅十一月二日卒于萬曆壬午三月二十七日享年八十九歲男一卽懋益女二長適吳滔次適鄭阡孫男三烈先烈光烈允孫女二長適方仲昭次字吳萬春曾孫男五堯賓堯宗堯彥堯官堯謨曾孫女二皆幼懋益卜以某年某月某日葬于某之麓銘之辭曰儷德而隱千年大寧松柏鬱其青青而余爲之銘

明文林郎長汀縣知縣蘇公墓志銘

公之墓蓋在蓮湖山云萬曆癸酉余姻家叔郊氏謂余曰先人之以長汀終也二孤方在齟齬克襄事者五年于茲矣豈其愛于方尺之石也蓋有待焉今願請於子余惟是懼曷可以不朽長汀公也然世德足徵有厥宗人進士惟一之狀在遂誌焉蘇之先出武功炎宋時太尉紹基自南雄入廣卜居南海之碧江故今爲順德人太尉之支孫觀祐觀祐生義義生軫軫生順娶羅氏成化甲午十二

月二十七日寔生公公諱瑤字朝珍幼穎悟異常
兒稍長力學事黃郎中著習禮記不更他師弘治
辛酉莆田宋公端儀視學嶺南首選公爲郡弟子
員朝夕受博士業博士避席白宋公曰禮經解首
蘇生其人矣是秋果舉鄉試第五人壬戌赴南宮
病不入試乙丑中乙榜當署教職友人勸之辭公
曰親老矣丈夫奚必甲科行志哉授全州學正全
士甲湘桂斌斌多文學執經問難者日滿齋閣人
人自以得先生晚也督學憲副浙江姚公鵬闢五


經書院拔諸郡之秀異者教之以公爲五經師後
全州士及諸郡來學者多以科名才行起部使者
嘉獎不一學士蔣公冕薦陞蘇州府教授吳長洲
二縣士業禮者咸來講授不但府校諸生傳經而
已然俗喜遨遊歌唱婚喪溢侈又每水葬公以禮
申禁舊習一時丕變御史按三吳者靡不優重焉
少傅王公鏊欲公久任遂歷六載循例擢寧津令
以試治行至則延諸生譚經猶蘇也會京畿諸郡
曩以軍興故征斂繁重流賊甫平寧津小邑疲困

未蘇且供億候置什器芻粟舊委諸編戶歲額定數十大家箕歛給役百姓苦如束溼得代若解懸公覈羨稅度支在官工賈簿正支費不以緩急困苦邑民田里晏然又未嘗飾廚傳稱過客轂擊出其塗者頗不悅未幾以外艱去畢喪有終焉之志邑人故相梁公儲得請致仕日與之扁舟相從樂也當是時世宗初政擇用循吏梁公力勉之起大冢宰知其入補令長汀待次召入也汀守方議恢拓郡城佐貳適監司親黨利於督工公上議兩院

曰東南海上縮波而郡者數城莫汀堅也軍衛在焉城小易守兵不雄之千艘而雄之百雉哉是役也豈不知綏奠民萌然工築苦矣時詘舉羸某以爲非便民驩呼罷役而擠排已釁於此公竟歸矣中丞聶公賢在虔臺歎曰蘇令去汀民孰賴乎非朝家擇用循吏與民休息意也歸則漁釣碧江之上數年乃卒蓋嘉靖丁亥正月二十四日也年僅五十有四娶黎氏趙氏無出繼娶秦氏何氏秦蘇州人生一子夢龍一女嫁泰安州吏目歐乾初何

同邑人生一子夢麒卽叔郊一女嫁何克孫男女
十人子蕃子和子參一女嫁何可久俱夢龍出子
昌子昇子昂女嫁歐莘余次子也幼者未聘俱夢
麒出秦氏生于弘治辛酉二月十五日卒于隆慶
庚午六月二十二日何氏生于弘治壬戌正月二
十八日卒于嘉靖甲寅十一月初六日二櫬與公
合嗟夫經無專門久矣弘德間嶺南傳小戴禮者
稱黃郎中其門人魁于省魁天下者十數舉不絕
公尤世守曲臺之訓至今八桂三吳河間汀州之
士傳其業者尚名蘇先生禮也孰與東海孟卿家
世爲禮乃喜也從田王孫受易哉然以公之經術
治行終於一令未能行其志百一惜夫惜夫于是
刊石銘曰胡其祿不延胡其福以綿有封蓮湖若
屋然後千百年斯爲長汀公之阡

歐虞部文集卷之十三終



程